

## Christliken Bede.

scholde vns billicken reizen tho biddende / De wile dat Godt nicht allene so gädich ys / dat he helpen will / den dede bidden / Sünder ock bläth tho biddende / Luce am achteinden / vnde an velen andern örden mër / Welcker de parners den lüden schollen vörholden . Wenn dar ein Vörste were / de nicht allene geue / wat me van em begerde / Sünder böde ock ydermanne tho biddende / wat einem ydern van nöden were / den worde me vor einen gnedigen herren holden / vnde vël van em bidden / Wente yo wy mër bidden / yo he leuer giff / Alse he secht van Magdalena / Luce am söuenden . Darumme wert er vël vorgeuen / wente se sich ganz vël gudes tho my vorsüth .

Thom andern / schollen se leren / dat Godt ock thogesecht hefft vns tho hörende / Matthei am söuenden / Luce am elfften / Biddet / so wert iuw gegeuen . Vp solcke thosage scholle wy vns vorlaten / vnde nicht twiueln / Godt hört vnse bede . Alse Christus sprickt Marci am elfften . Darumme sege ic iuw / allent wat gy bidden in iuwem bede / löuet men dat gy ydt entfangen werden / so wert ydt iuw werden .

Vns schal ock nicht affscreeken / dat wy sünders syn / Wente he hört vns nicht vmmie vnser vordenstes / sünder vmmie syner thosage willen . So steit Michee am lesten . Du werst Jacob truw / vnde Abraham gädich syn / alse du denn vnser vötern in vörtiden geswaren hefft .

Doch ys des sünders vnde hächelers bedt nicht erhört / de nene Kuwe hefft auer syne sünde vnde de hächelye / Wente van den süluen ys gesecht / ym

**B** achtanden